

Plasa Betico Croes mester bira un luga multifuncional

Director di Departamento di Cultura Siegfried Dumfries tabata presente diahuebs mainta hunto cu Minister Otmar Oduber, DOW y Comision Celebracion Dianan Nacional (CCDN) na Plasa Betico Croes pa mira e trabounan cu lo wordo haci pa renobacion y mehoracion di e plasa.

Na momento cu e plasa ta cla pa wordo uza ta importante cu via Departamento di Cultura tin contacto cu e

diferente gruponan di arte y cultura cu lo kier haci uzo di dje pa por train, segun Sr. Dumfries. Asina lo duna e oportunidad necesario na e diferente gruponan pa por haci esaki.

Departamento di Cultura tambe lo por maneha e schedule pa loke ta uzo di Plasa Betico Croes pasobra loke ta importante ta pa e ta un plasa multifuncional cu cada ken cu kier haci uzo di dje por haci esaki tambe. Robert Maduro, miembro



di CCDN a bisa cu normalmente tur aña e comision tin diferente actividad oficial na Plasa Betico Croes y mirando cu na 2016 e celebracionnan aki lo bay ta mas special dor di e 40 aña di Himno y Bandera y 30 aña di Status Aparte.

E ta contento cu e vision di Minister Oduber pa renoba Plasa Betico Croes cu lo haci di e plasa uno miho pa e diferente celebracionnan oficial, specialmente esunnan di otro aña. □

Minister Otmar Oduber ta lamenta cu nunca antes a haci esaki

Plasa Betico Croes lo wordo renoba despues di casi 30 aña



Diahuebs mainta Minister Otmar Oduber hunto cu DOW, Departamento di Cultura y Comision Celebracion Dianan Nacional (CCDN) a bishita Plasa Betico Croes pa mira e estado den cual e plasa ta y wak tur loke mester wordo haci pa renoba esaki.

Minister Oduber a bisa cu e preparacionnan a cuminsa pa e celebracion grandi cu tin otro aña, 30 aña di Status

Aparte y 40 aña di Himno y Bandera. Den e cuadro aki mirando cu pa e celebracion cultural semper ta uza Plasa Betico Croes a dicidi di mira e con e situacion di e plasa ta. “Mi ta lamenta masha hopi mes di mira e condicion den cual e ta aden, casi 30 aña y practicamente nunca a haya un mantencion, a haya un beurt pa mantene. Apenas 5 aña pasa a haci un trabou riba e dak cu tin den e koepel di e plasa, pero esey tambe ta den

condicion pesimo”, Minister Otmar Oduber a indica.

P’esey hunto cu DOW y Departamento di Cultura a inspecciona e luga y mira tur loke mester wordo haci y kico mas por realisa pa haci e miho uzo di e espacio cu tin. Intencion ta pa por haci di Plasa Betico Croes un sitio multifuncional caminda lo por duna training, les, baile y diferente otro aspecto cultural. Esaki lo bay sosode na

e parti abou di e stage cual no ta wordo uza. Tambe lo percura pa e back stage haya aircu mirando e calor cu hopi biaha artista ta keha di dje y lo atende cu e otro aspectonan di e parti aki pa haci uzo optimal di dje. Igualmente lo duna henter un beurt na henter e plasa pa duna esaki un aspecto nobo, un aspecto mas moderno, un aspecto mas atractivo di loke e ta na e momentonan aki. E mandatario a remarca un

biaha mas cu ta di lamenta cu ningun Gobierno a duna e atencion necesario na e plasa aki y e ta contento cu hunto cu DOW, Departamento di Cultura y CCDN lo bay duna Plasa Betico Croes e atencion debido.

Ya caba ta combersando pa mira for di unda e fondonan lo bin pa percura cu e plasa wordo drecha na tempo pa e por ta cla otro aña pa e celebracion grandi. □